



# ENSENHAD'ÒC

ENSENHAD'ÒC N° 73 - BUTLETIN DEL CREO - SEPTEMBRE DE 2018

Convocacion de totes los sòcis a l'

## Amassada Generala del CREO :

### dissabte 6 d'octòbre a 9h30

a Montpelhièr a l'Universitat Paul Valéry, sala A105

Convocation de tous les membres à l'

## Assemblée Générale du CREO :

### samedi 6 octobre a 9h30

à Montpellier à l'Université Paul Valéry, salle A105

Ordre du jour :  
Bilan moral  
Bilan financier  
Rapport d'activités  
Renouvellement du bureau  
Perspectives

Òrdre del jorn :  
Bilanç moral  
Bilanç financier  
Rapòrt d'activitats  
Renovelament del burèu  
Perspectivas

Collègi  
d'Ambrussum :  
una annada  
cargada de  
projèctes!

Un avenidor  
bilingue a  
Clémenceau


De collegians  
cineastas : una  
annada de  
cort-metratges

Licéncia LLCER  
Occitan :  
mòstra e  
acuèlh

Plantas  
e Baragònha  
a St Geniès

Mercès al mond qu'an participat a aqueste numèro d'Ensenhad'òc per sa redaccion e son mandadis: Catarina B., Catarina N'D., Clamentina, Claudina, Estela, Fabiana, Joseta, Magali, Maria-Joana, Maxime, Melania, Monica, Sarah.

Mercès a las collectivats territorialas per lor ajuda al CREO



# Editorial

Bona represa, bona dintrada e bon mes de setembre a totes !

Vaquí qu'arriba l'AG novèla aprèp una annada de las cargadas per l'ensenhament de l'occitan ! O ramentarem pas tot dins aquel editorial que prendriá tròp de plaça mas, o sabètz, avètz tot sul sit [FELCO-CREO.org](http://FELCO-CREO.org)

Quauques mots suls punts fòrts de l'annada que s'acaba :

- lo punt positiu del polit mes de mai : **la comuna de Montpelhièr qu'aculhís e sosten la fèsta de l'occitan** per las escòlas de la vila. Joseta Soliva rescontrèt Guy Barral en genièr e lo 17 de Mai los dròlles dançavan sul Peiron ! Trobaretz de fòtos dins las paginas que seguisson. Esperam qu'aquò se poirà far cada annada e que permetrà de valorizar e desvolopar l'ensenhament de l'occitan a l'escòla publica dins la prefectura.

- **lo monta-davala emocional del Conselhièr Pedagogic Departamental** (CPD) d'Erau : fan petar lo pòste aprèp trenta ans d'existéncia, lo conselhièr regional nos assegura que lo pòste es restablit, la DSDEN ditz de non e que manten lo sistèma d'ongan (doas mièjas-descargas), mobilizacion de las gròssas, e just aprèp lo CALR, lo pòste es enfin publicat ! Una crana victòria deguda a una mobilizacion importanta dels collègas, dels parents, dels elegits e dels sindicats.

- **lo Rector es partit, visca la Rectritz!** Podiam pas que bufar de veire l'anciana-rectritz l'ancian rector anar far de misèrias endacòm mai. Benlèu que i a pas d'asard : quauques setmanas aprèp sa presa de fonccion, la Rectritz novèla organizèt lo CALR. E per un còp, quin CALR ! I aviá plan de mond, los costumièrs + d'elegits venguts nombroses. Çò mai estonant foguèt l'actitud de la rectritz : una escota e un interès que i eriam pas acostumats. Una suspresa tan bèla que s'acabèt lo CALR per d'aplaudiments !

Podètz legir en linha [la mocion que portèt lo CREO](#) e [lo compte rendut del CALR](#).

- **l'agregacion : de la suspresa estrambordanta a la decepcion macroniana.** Eriam totes plan uroses d'ausir la recritz tolosana que nos anonciava al collòqui de la FLAREP a Montpelhièr la creacion de l'agregacion Lengas de França. Eriam plan uroses de ne veire [la parucion dins lo BO](#). Eriam contents del programa tras qu'interessant. Foguèrem un pauc mens contents de [la publicacion del nombre de pòstes](#). E foguèrem francament decebuts e enrabiats de [la non-dubertura del concors en 2019](#). Trobaretz dins las paginas seguentas çò que se faguèt a l'Universitat Paul Valéry.

- **Escampats del CRDP.** Vaquí ! L'istòria del CREO amb lo CRDP es definitivament acabada aprèp mai de trenta ans de relacions e de publicacions. Ja que dempuèi quatre o cinc ans, lo CRDP ara vengut CANOPE, aviá arrestada tota publicacion occitana (albums, revista pedagogica *Lenga e País d'Oc*), escampan lo CREO. I avèm pas mai nòstre sèti social. Avèm degut vuejar los armaris e los tiradors, tirar del mitan tot çò nòstre. Es triste per lo CREO de n'èsser escampat, mas es encara mai triste per los emplegats que son ara dins aquel CRDP-vaissèl fantauma que d'autres vòlon enfonsar. Demòran de publicacions occitanas polidas que son totjorn disponiblas e que podèm totjorn crompar... fins que las mètesson al pilon, elas tanben ?

- **Escampats del CRDP, sauvagardats pel CIRDÒC**  
Mai de trenta ans de vida associativa èran amolonats dins los armaris del CRDP. Aquò s'escampa pas. Aquò's l'istòria. Faguèrem una tria, de cartons, de caissas e un matin de julhet, Benjamin Assié, director conservator, e Françoise Bancarel, archivista, venguèron quèrre lo passat archivat del CREO per l'inventoriar e lo gardar al CIRDÒC. Aquò serà a disposicion dels cercaires futurs.

[Legir l'article publicat dins la Cooperativa.](#)

## - Maria-Joana pren la retirada.

Que nos triguèsse o que nos laguèsse de la veire partir, aquò serà aquesta annada que Maria-Joana prendrà sa retirada. Serà doncas sa darrièra AG coma Presidenta e, sòcis del CREO, nos cal pensar a la seguida. Segur, aquò fa bravament paur. Maria-Joana es una maquina de trabalh. Subrepresenta, subrequalificada, subreconeguda, subrereactiva, los superlatius mancan pas per descriure nòstra Presidenta qu'a fach un trabalh enormàs dempuèi tantas annadas. Quid de la seguida?

Secretària de la FELCO ont se règla tot un fum de problèmas al nivèl ministerial, qual prendrà la seguida? L'AG serà lo 8 de decembre.

E per la presidéncia del CREO ?

Per ara, degun s'es pas manifestat per la prene la seguida. Vertat, president d'una associacion, quina que siá l'associacion, es una carga de las pesugas. E lo CREO es una associacion importanta, vitala per lo manten de l'ensenhament de l'occitan e podèm pas daissar que se desanèsse, que se perdèsse, que se desbrandèsse.

Mas benlèu qu'a l'AG aurem una polida suspresa amb de candidats e candidatas motivats e estrambordats per prene lo relais e portar un vam novèl al CREO.

L'associacion a besonh de cadun de sos sòcis per far avans!

---

*Adieu e ten-te fièra!*



Estela Mazodier a decidit de quitar l'ensenhament.


Es totjorn estada una interlocutritz de tria per lo CREO. Sa simpatia, sa disponibilitat, sas coneissenças, son risolet, sa modestia, son intelligéncia, son agach totjorn juste, totas sas qualitats umanas e intellectualas nos mancaràn al dintre de l'associacion mas nos consòla de saber que la crosarem encara !

Li desiram capitada e mai que mai bonur dins sa novèla vida professionala.

Mercés Estela !



# Projetè acadèmic



Ongan, « Cadelet detectiu » serà lo companh d'aprendissatge dels escolans de l'acadèmia. Coma cada annada, lo projetè s'adreïça a totas las classas de mairala e d'elementari de Losera, de Gard, d'Erau e d'Aude e los ensenhaires lo pòdon adaptar segon son nivèl d'occitan e segon lo nivèl de sos escolans.

Lo projetè de 2018-2019 vira a l'entorn de **doas enquèstas** del «Cadelet Detectiu. ». La primièra partida consistís a retrobar lo material desaparegut dels animals de la bòria que vòlon participar a una mòstra dels **mestièrs d'art**. Coma cada annada, lo libròt es una **benda dessenhada** e coma o podètz veire sus la cubèrta, aquò se passarà dins un musèu Fabre vandalizat. Cadeleta ajudarà la conservatritz e descobrirà **las òbras dels artistas** : l'art contemporàneu de Viallat, l'impressionisme de Bazille, lo realisme de Courbet, l'art abstrach de Soulages e tanben Pierre François, « paire de la figuracion liura ».

En mai d'un trabalh linguistic, tot lo projetè se bastís a l'entorn de l'interdisciplinarietat.

Lo projetè pedagogic acadèmic occitan es una capitada, e cada annada, de classas s'i venon apondre. L'an passat, **13 000 escolans** participèron a un dels bèls **recampaments departamentals** que venon clavar l'annada.

# Fèsta de las escòlas publicas de Montpelhièr



# Fèsta de las escòlas publicas de Montpelhièr

L'ensenhament de l'occitan dins lo public es present dins un desenat d'escòlas primàrias a Montpelhièr. Dins lo **trentenat de classas** concernidas, l'ensenhament de lenga e cultura regionalas pren diferentas fòrmas : sensibilizacion, ensenhament de lenga o ensenhament bilingüe.

Pendent tota l'annada los escolans an trabalhat sul projècte academic « Azalaïs la trobairitz » fargat per las conselhièras pedagogicas de l'acadèmia de Montpelhièr.

**Per lo primièr còp**, aquesta annada, se debanèt al Peiron lo 17 de mai, la fèsta de las escòlas publicas de Montpelhièr. **300 escolans** amb lors parents s'acampèron per dançar al son de la flaüta e de l'acordeon de Fai Mascat. Malgrat la calorassa, rondas, borrèia e giga faguèron bolegar lo mainadum. Lo Drac e la princessa Azalaïs presents a la fèsta se mesclèron als enfants per dançar.

Lo balèti s'acabèt amb la farandòla del « Drac » dins un aire polsós.

Quina capitada !

Mercé als enfants, parents e ensenhaires per lor preséncia !

Aqueste eveniment foguèt possible mercés a Guy Barral de la comuna de Montpelhièr e al sosten de ZO Petaçon ajudat per la Region Occitanie e del CREO. Mercegi totes los benevòls que m'acompanhèron per la securitat de la fèsta. Vòli tanben mercejar aquí Sandrina Esco e Clementina Mayzoué qu'acceptèron de montar sus l'empont amb ieu, Poguèrem aital dire adieu a las classas. Nòstra mission s'acaba, per l'an que ven es Celine Serva que farà de CPD per Erau.

Josea Soliva  
Animatritz Lengas et Cultura Regionalas – LCR34

# De nòvas de las escòlas bilinguas

## De nòvas del cursus bilingüe de Nelson Mandela (Besiers)

Per aquesta dintrada, la còla se renovèla un pauc. Los ensenhaires bilingües son :

- Celine Gil per la mairala ;
- Clémentine Mayzoué amb los CP desdoblats ;
- Priscillia Gil aurà los CE1-CE2 ;
- Lo director, Nicolas Alberola, prendrà los CMI-CM2.



Siam plan contents d'aver lo cursus bilingüe dins totes los nivèls e que totes los professors de l'escòla siagan interessats pel projècte occitan! Mas... l'an que ven, aqueles pichons bilingües que se'n van al collègi, faràn pas pus d'occitan? Un afar de seguir...

## Bilan de l'annada de l'escòla bilingua de Sant Privat (Gard)

Avèm participat pendent dos ans al **projècte Comenius**. Mercés a aquel projècte, avèm poscut fargar de jòcs informatics sus internet. Per la mieuna classa, aquò a permés de far una correspondéncia amb una classa mairala de Val d'Aosta en Itàlia.

Coma cada annada, avèm participat al **projècte academic occitan** que s'acabèt per lo recampament a Somèire. Aquela sortida agradèt fòrça als parents acompanyadors e faguèt sortir l'occitan de l'escòla.

Maxime Privat  
Classa de mairala bilingua de Sant Privat dels Vièlhs dins Gard



# Collègi de Clarmont d'Erau: e zo mai un prèmi de ganhat !

*Classas de Catarina Bataller*

Los escolans del collègi de Salagon de Clarmont d'Erau an ganhat lo primièr prèmi del concors *Viatge 2018* organizat per lo Conselh Departamental d'Erau.

Na Passieux, viça-presidenta del Conselh Departamental d'Erau, venguèt portar als collegians un chèc de 3000€ lo diluns 25 de junh, en preséncia de Dòna Villeneuve, inspectritz d'occitan e de Sénher Hippert, principal del collègi. Escolans e parents d'escolans èran venguts nombroses per l'escasença.

Los escolans avián realizat un film de cinc minutas per presentar lor viatge en Dordonha. L'originalitat del film e l'implicacion dels escolans dins la realizacion convenquèron la jurada.

Aquel argent permetrà als occitanistas del collègi de Salagon de preparar d'aise lo viatge escolar previst en 2019

Òsca a totes los escolans per lor trabalh e lor creativitat!



# Collègi Ambrussum a Lunèu : un fum de projèctes

Classas de Catarina Dufour

## Los Ambassadors d'Ambrussum

Lo projècte consistissiá a formar tot de long l'annada escolara d'« Ambassadors » **cargats de far sortir la lenga de la classa.** S'agissiá de valorizar lo trabalh efectuat long de l'an en li trobant un destinatari. Un desenat d'escolans d'occitan faguèron una



virada dins las escòlas primàrias de Lunèu, Vilatela e St Seriès. Presentèron lors kamishibai, poèmas e cançons. Presentèron tanben lo film *Leis amics de la Baragònha* fach amb TeVeÒc. Puèi, respondèron a totas las questions sul collègi que se pausavan los escolans de CM2 e se prepausèron coma tutors per las primièras setmanas de setembre.

## De Kamishibais a l'entorn de las *Faulas de La Fontaine*

Los escolans de 5<sup>a</sup> trabalhèron sus las reviradas de las faulas de La Fontaine de Marceu Esquieu. Tralhèron, memorizèron, se registrèron e dessenhèron per poder presentar lors faulas e ilustracions als autres escolans occitanistas del collègi e als escolans de las quatre escòlas del bassin que participan al projècte « Ambassadeurs ».

## Sortida pedagògica a Besièrs



La classa patrimoniala d'Ambrussum faguèt una visita istòria de la vila de Besièrs e visitèt segur lo Cirdòc (fòto).

Ne faguèron un film de cinc minutas que lo mond poguèron veire per la jornada Florilègi d'Ambrussum dels projectes

## De posters sus animals totemics

En seguir lo tèma de l'annada, los escolans trabalhèron sus l'imaginari e mai que mai sus la plaça dels animals totemics dins l'imaginari collectiu de la region. Los panèus èran expausats dins la classa, al CDI e dins la dintrada pendent la jornada Florilègi. Los presentèron tanben als escolans de las quatre escòlas partenàrias del projecte « Ambassadors ».



## **Cort-metratge a l'entorn dels imaginaris collectius regionals**

Foguèt un trabalh collectiu que totes los nivèls s'i impliquèron. Los escolans de 4<sup>a</sup> e 3<sup>a</sup> escriguèron lo scenario e juguèron dins lo film. Los 4<sup>a</sup> escriguèron la cançon del film, los de 5<sup>a</sup> juguèron los mediators dins las escòlas del bassin per presentar lo film. Prepausèron lo film a dos festenals del film escolar en lenga regionala. Projectèrem lo film al collègi, a la sala polivalenta, per la tantossada « l'Occitan fai son cinèma », dubèrta a totes los escolans e personals liures a aquel moment e en preséncia del cap d'establiment. Una serada projeccion se faguèt tanben a Sant-Cristòu, sus las tèrras de la Baragònha, a destinacion de las associacions partenàrias: l'associacion dels amics de la Baragònha, los realizaors de TeveÒc e lo club occitan de Sant-Cristòu. Pendant aquesta serada conte/cinèma, los escolans presents poguèron viure una experiéncia intergeneracionala e viure e ausir la lenga en defòra de la classa. La darrièra projeccion, destinada als parents e als amics del collegians se debanèt al collègi per la jornada Florilègi d'Ambrussum.

*Podètz veire lo film sus la cadena Youtube de TeveOc*

[https://youtu.be/h\\_2jICpHwcU](https://youtu.be/h_2jICpHwcU)



# A Sant Geniès de Malgoires

*Classas de Claudina Paul*

## **Las plantas e l'imaginari : cada planta a sa vertut**

Dins l'encastre del Projècte Pedagogic Academic occitan 2017/2018 qu'a per tèma « imaginaris », los escolans del collègi Frederic Desmons an trabalhat a la creacion d'un scenario de film cort qu'an realizat puèi amb l'ajuda de l'associacion Tè Vé Òc.

Los escolans partiguèron de la fèsta de las mascas, estudièron aqueles personatges dins los contes occitans e los testimònis de « caças de mascas ». Repertorièron las rasons qu'èran secutadas a l'Edat Mejana. Creèron lo personatge principal de son scenario : Felicia, una escolana novèla qu'arriba al collègi, estranha, diferenta dels autres, que se vei secutada sus un malentendut per sa coneissença de las plantas e sa passion per la natura. Lo scenario se metèt en plaça e los actors aprenguèron lor ròtle. Los que volián pas èsser filmats poguèron participar al rodatge coma tecnicos : preneires de son, costumièrs, accessoristas, assistents de realizacion, dorsièr premsa e comunicacion... totes los mestièrs del cinèma foguèron atribuits.

Las quatre sesilhas de rodatge se debanèron entre mars e abrial de 2018, sus las doas oras setmanieras d'occitan, al collègi e en defòra amb los conselhs de professionals : Lisa Gròs e Miquèu Gravier de l'associacion de produccion audiovisuala Té Vé Òc que produsís l'emission Lengadoc sus Youtube e son sit internet <https://www.youtube.com/channel/UC-qg4iwctGoCthnrhFUUP0A/videos>



Montèron las presas de vista qu'agrementèron de musica amb lo títol *Ensems* qu'evòca las discriminacions, creat per los collegians occitanistas de Brinhon en 2016 amb lo grop Mauresca a l'escasença d'un precedent talhièr pedagogic.

D'aquel temps, los collegians constituiguèron d'erbièrs bilingues occitan/francés (e de còps latin) amb las plantas amassadas a l'entorn de son ostal. En cors, classèron las plantas « magicas ». Puèi fin de mai, perfeccionèron sas coneissenças amb una sortida escolara a Usès mercés a l'intervencion de l'etnobotanista



Josiana Ubaud <http://josiane-ubaud.com/> que guidèt una visita tematica del Jardin Medieval per melhor conéisser las vertuts de las plantas que nos enròdan e sas utilizacions : plantas medicinalas, aromaticas, tinctorialas, toxicas... Los gafets botanistas poguèron legir lo païsatge a l'entorn de la ciutat d'Usès en montant al cim de la torn de l'avesque.

Dòna Ubaud lor faguèt relevar los marcaires vegetals amb, al primièr plan, las platanas, los maroniers e los pins de la ciutat puèi, los olius, las figuieras, los ametliers e los cipreses a l'entorn dels mas, los pibols, los boisses e los euses. D'unes d'aqueles arbres son de còps venguts de luènh e n'an de nos aprene per son istòria... mas aquò farà l'objècte de projèctes novèls en 2018/2019 que lo tèma del futur projècte academic occitan es « Paisatges ».

Lo film *La Masca* foguèt projectat en abans-primièra lo 14 de Junh al foguier municipal de Sant Genièrs de Malgoiras en primièra partida de l'espectacle de la corala dels collegians de Gardonenca.

Aqueste projècte foguèt possible mercés a l'ajuda de [Zo Petaçon](#), l'associacion academica d'animacion pedagogica en occitan que fonciona amb l'ajuda financièra de la Région Occitanie.

<https://www.facebook.com/ZoPetacon/>

---

## Escambis de pròf

Priscillia Gil, professora de las escòlas, ara titulara nomenada a Besièrs, a bastit un sit per partatjar los documents, las sequéncias, eça. L'adreïça del sit : <https://escambisdeprof.wixsite.com/occitan>

L'email per li escriure, li pausar de questions, li mandar de matèria : [escambisdeprof@gmail.com](mailto:escambisdeprof@gmail.com)

E la pagina Facebook: <https://www.facebook.com/profdoccitan/>

# A Clémenceau a Montpelhièr

Classas de Magali Fraisse

## Los projectes per 2018-2019...

**Correspondéncia** - Los collegians de Clémenceau van correspondre amb lors collègas de Clemence Royer, un autre collègi de la vila. La correspondéncia se debanarà tota l'annada e se clavarà sus un rescontre al mes de mai.

**Clem en sons** - Los escolans de Primièra van revirar en occitan e registrar lo percors sonòr per visitar la ciutat escolara qu'existís ja en francés.

**Vert Paradis** - Amb los professors de SVT e d'arts plasticas, anam metre en plaça una senhaletica bilingua francés/occitan de la flòra del pargue del licèu. Sus las placas, i aurà tanben un Qrcode que mandarà sus una tièra de documents artistics, linguistics, scientifics e literaris.

## ... e de projectes bèls per l'avenidor :

**6<sup>ena</sup> bilenga per 2019-2020:** 3h d'occitan / 3h d'anglés e l'istòria-geografia en occitan per los ancians escolans de las doas escòlas del sector amb un ensenhament de l'occitan : l'escòla publica bilingua Marie Sévigné e la Calandreta Lepic.

## Seccion LCR Lengua e Cultura Regionala al licèu:

-3h de renforçament de la lenga en mai de las 2h ja existentas

-1h30 de Sciéncias Economicas e Socialas en occitan amb Regis Labedan, professor de SES licenciat d'occitan.

Lo public : los collegians de Vilanòva de Magalona que seguisson ja la DNL istòria-geografia en occitan, los ancians escolans de Marie Sévigné venguts collegians a Clémenceau, los ancians escolans de Miraval, los ancians calandrons e collegians del collègi Calandreta Leon Còrdas.

S'endralhariá dins lo projecte d'establiment « arts, sciéncias politics e umanismes ».



# A la fac


## Los estudiants al musèu Fabre



Los estudiants de 2<sup>nda</sup> e 3<sup>ena</sup> annada de licéncia d'occitan aguèron l'astre de poder participar a la mòstra « Muses et Grisettes - Les Dames de Montpellier » de l'Hôtel Sabatier d'Espeyran a Montpelhièr. Revirèron en occitan lo tèxt d'introduccion e registrèron los poèmas escriches en occitan al sègle XIX que las grisetas n'èran las musas... Foguèron tan bons que sas voses foguèron utilizadas tanben en francés. Aquò foguèt una polida aventura dins l'estudio de registrament de la fac per los estudiants qu'anèron puèi visitar totes a m a s s a l a

mòstra per s'escotar. Foguèt l'escasença de trabalhar la lenga, de sortir de la fac e de ne saber un pauc mai sus aquelas montpelhierencas.

Aquesta mòstra èra un projècte bèl de partenariat entre l'Universitat Paul Valéry, lo musèu Fabre e l'escòla ArtFx. La cap de projècte, Maguelone Nouvel-Kirschleger, cercaira en istòria e autora de *Montpellier, cité des belles dames*, tenguèt a la preséncia de l'occitan dins lo projècte.



## **Los LI aculhisson los occitans de Sant Africa e los catalans de Tremp**

Es lo segond còp qu'aculhissèm los escolans sant-africans de Bruno Duranton e de Nathalie Causse. Ongan, un quarantenat de Catalans e un trentenat d'Occitans venguèron visitar la vila e l'Universitat. Son los estudiants de Primièra annada que faguèron los guidas : lor preparèron l'itinerari e un document que los escolans avián d'emplenar. Los estudiants i metèron plan de vam e d'estrambòrd per mostrar aquesta vila que cap n'es originari mas que totes i demòran per los estudis. Esperam que tant los Avaironeses coma los Catalans gardaràn un bon sovenir de sa jornada montpelhierenca e qu'auràn enveja de venir estudiar a l'UPV !



## **2017-2018 : la primièra annada de l'agregacion**

L'esperaviam, la demandaviam e tot d'un còp, l'aguèrem !

L'esperavan los collègas del segondari aquela agreg'! E se marquèron nombroses a las formacions de las universitats de Montpelhièr e de Tolosa. Èran **setze de marcats a Paul Valéry**.

Demandèt bravament de trabalh de la dubrir la formacion : la preparacion dels corses, plan segur, mas pas solament. Dubrir una formacion novèla a l'universitat es un trabalh administratiu enòrme e longàs. Per astre, aguèrem **lo sosten de la direccion** que donèt de mejans per dubrir aquesta formacion. Cal saber que las universitats, dins lo sistèma de las autonomias de las universitats, recebon d'argent solament per los estudiants de Licéncia, Màster e Doctorat (LMD). Consequéncia immediata : los DU e los concorses se devon autofinanciar e se i a pas pro d'estudiants de marcats, es a l'universitat de far un esfòrç financièr per manténer las formacions fòra-LMD. Poguèrem dubrir aquesta formacion mercés a la volontat de nòstra universitat que demandèt l'ajuda de la Region Occitanie per aquò far.

La preparacion a l'agreg, la dubriguèrem a distància, **una formacion ibrida**: de corses presencials cada dissabte disponibles en visio-conferéncia. Aital los collègas que podían pas anar a Besièrs o a Montpelhièr seguir los corses, los podían seguir mercés a una bona conexion internet. En mai dels corses lo dissabte, los estudiants avián sus **la plataforma de corses** de documents e un molon d'exercicis de far : tèma, version, dissertacion, comentaris. Caumèron pas! Una crana promocion!

Mas en decembre, la missanta nòva tombèt : un solet pòste per un cinquantenat de marcats al concors, un solet pòste per vint e cinc candidats marcats a una formacion universitària assegurada per las Universitats de Tolosa e de Montpelhièr. Docha freja, glaçada, per los candidats, per los formators e per la FELCO qu'aviá luchat tant e mai.

Malgrat aquò, de resultas plan bonas a l'escrich per una granda part dels candidats. La règlà fa que solament quatre foguèron admissibles a l'oral, dos candidats formats a Tolosa, dos candidats formats a Montpelhièr, totes ja ensenhaires dins lo segondari, pròva se ne caliá de l'importància d'aquesta agregacion per los collègas.

Quatre admissibles, un admés : Emanuèl Isopet. Òsca a el !

Segonda decepcion pendent l'estiu : pas de dubertura en 2019!  
Pas d'agregacion d'occitan en 2019, ni d'agregacion de breton.  
Dubrisson lo catalan e lo basc qu'avián pas dubèrts en 2018 e tòrnán dubrir lo còrs.

La FELCO a comunicat e escrich a totes los elegits per luchar contra aquesta decision que d'unes an interpelat lo govèrn. Plan segur, la FELCO a tanben escrich al ministre.

Es una colèra gròssa per totes e una lucha de mai que mena la FELCO !

Podètz legir çai jos lo sentit d'Estela e de Sarah qu'an seguida la formacion.



*de notar dins l'agenda*

**AG de la FELCO**  
**Dissabte 8 de Decembre de 2018**

## **Preparar l'agreg d'occitan: una experiéncia rica**

Un sol pòste al concors, la concurréncia s'anonciava dura. E pasmens, es pas dins un esperit de competicion que los candidats se lancèron dins la corsa. Reteni d'aquela annada de formacion la qualitat dels corses donats par l'Universitat Paul Valèri de Montpelhièr, e l'estrambòrd dels candidats a tornar cabussar dins los estudis aprèp d'annadas de servici dins l'ensenhament. Cal dire que, per la màger part d'entre nosautres, las condicions de trabalh se son durcidas aquelas annadas, al punt de nos metre lo moral en berna. Se tornar metre a estudiar los grands tèxtes de nòstra literatura, los grands autors e la civilizacion, a per efiech de nos tornar motivar, nos donar un novèl buf, e nos confortar dins l'idèa que maldespièch las escòrnas que subissèm dins nòstra mission d'ensenhaires passaires de lenga, l'occitan a una granda literatura, l'occitan es una lenga sabenta e saborosa, avèm de causas de dire al monde, tenèm-nos fièrs! Ne dobtàvem, a fòrça de subir lo mesprètz institucional.

Felicitacions a l'unenc candidat urós d'aquela promocion: Manu Isopet.

Regretam que i aja agut qu'un solet pòste, e regretam encara mai que n'i aja degun per la session 2018-19. Los candidats èran motivats per tornar començar l'aventura, de que ne serà l'an d'aprèp? Qual serà lo nombre de pòstes dins las annadas a venir?

Estela Lame

Sabi pus quora, mai pendent la fin de l'annada 2016-2017, la rumor de la dubertura de l'agregacion dei lengas de França començava de faire camin. Un collèga declarèt que se passava, lo monde vendrián s'inscriure amassa. Avia pas tòrt.

Tota aquesta annada, se i avia una paraula per l'illustrar sariá « estrambòrd » que toteis aquelei que seguiguèron la formacion, que siegue a Tolosa o Montpelhier, va èran, estrambordats d'a fons.

Melania, Barbara, Estèla, Patric, Deidié, Aimalina, Natalío... e tant d'autres, dirai pas totei lei noms que prendriá tres paginas, nosautres que causigueriam la formacion de Montpelhier per rasons afectivas, geograficas o autras, i eriam fins au bot. La novèla que i avia solament un pòste nos faguèt pas manco cambiar d'idèa, e mema, per aquelei que capitèron pas l'escrich, un molon èran lèsts de demorar a la formacion per l'orau. Se posquèri pas assistir a París a las espròvas orales (son publicas e podèm anar veire cossí se passa), èra per rasons professionalas. Foguèt donc la soleta causa que manquèri...

Fin finala avèm pas desmeritat, pecaire... Lo nòstre escrich èra de tria. De segur que l'orau, l'èra tanben. Emanuau Isopet s'es ben batut per ganhar (Òsca, Manu !) mai totei leis autres ne'n èran dignes. Aquò se questiona pas.

Ja, parlaviam totei de l'an que ven, sens un planh per la nòstra cagada que ne'n èra pas una. Participar an aquesta agregacion, mai que mai an aquesta formacion èra ja una capitada. Per la lenga d'òc, per nosautres, per leis autres mai tard, aviam ja ganhat.

Tant coma an ja ganhat aquelei qu'an permés qu'aquela formacion siegue una capitada, dins lo pauc de temps e de mejans qu'aguèron, dins totei lei sacrificis que faguèron, dins la devocion sensa falha e sensa relambi que mostrèron, qu'an mostrat dempuèi l'an pèbre, que mostraràn encara e totjorn tant coma nosautres.

Òsca a vosautres Maria-Joana, Felip, Arvèi, Gilda, Laurenç... E totei leis autres qu'oblidè de marcar, aquelei de Tolosa e deis autres regions d'Occitània. Tot aquò es possible gràcias a vòstra lucha. E contunharem per estre dignes de vosautres.

Non, avèm pas perdut. Es la debuta e pas la fin. Vèrai, l'occitan es pas a l'agregacion per l'an que ven. Mai çò qu'aprengueriam es nòstre per totjorn. Esperarà lo moment que se retrobarem toteis ensems encara, leis uns a Montpelhier, leis autres a Tolosa, e benlèu, perquè pas ? A Lemòtges, a Marselha, a Clarmont, a Bordèu, a Pau... Siam ensems, siam fòrts, avèm l'estrambòrd. Siam vius.



## Borsa Ensenhar

Las regions Occitanie e Nouvelle-Aquitaine ajudan los estudiants que s'engatjan per venir professors de las escòlas en occitan. La Borsa *Ensenhar* es una ajuda de 8000€ sus dos ans.

Informacions : <http://ofici-occitan.eu/index.php/oc/borsa-pels-estudiants/>

## Felip Martel, *Òbras Completas Volum 2*

Aprèp lo best-seller de 2015 *Études de langue et d'histoire occitane*, aquí lo segond volum de tèxts martelians, *Vidas*. I trobaretz d'articles que parlan dels òmes e de las femnas, coneguts o mens coneguts, qu'an obrat per l'occitan, del sègle XIX fins ara. Indispensable.



## La recèrca occitana en linha

Podètz trapar en linha las doas revistas universitàrias montpelhierencas [Lengas](#) e [Revue des Langues Romanes](#). Ara, totes los articles son accessibles : los podètz legir, estampar e mai partatjar sus los malhums socials.

*Lengas* es una revista de sociolinguistica que vos porgirà matèria e reflexion a l'entorn de la linguistica occitana e las autras lengas. La *Revue des Langues Romanes* es una revista de romanistica publicada dempuèi... 1870 ! Son doas ara publicadas sus internet. Las versions papièr, las podètz totjorn crompar sul sit de las [PULM Presses Universitaires de la Méditerranée](#).





## **BUTLETIN D'ADESION 2018- 2019**

*Vos ramentam que vòstras coordenadas son pas comunicadas a degun.*

### **ADESION INDIVIDUALA** - L'escotisson de basa es de **20€**.

Nom e prenom :

Adreïça personala :

Tel : e-mel :

Adreïça professionala :

### **ADESION ESTABLIMENT** - L'escotisson es de **25€** per al mens doas classas aderentas dins l'escòla

Nom e adreïça de l'establiment :

Tel : e-mel:

Noms dels ensenhaires :

**ABONAMENT A** : Lo senhal

<http://www.felco-creo.org/>

Butletin de mandar a  
Claire TORREILLES / CREO Lengadòc – trésorerie  
25, avenue Clémenceau - 34000 Montpellier